

# Dr. M cabar Pas umum jenis kerajaan

UM 22 JUN 2004

**K**UALA LUMPUR 21 Jun — Presiden UMNO, Datuk Seri Dr. Mahathir Mohamad hari ini mencabar Pas mengumumkan secara bertulis jenis kerajaan yang hendak didirikan untuk membuktikan parti itu tidak berhasrat menipu kaum Cina seperti mana mereka telah menipu orang Melayu.

Tegasnya, Pas harus menerangkan secara jelas dan terperinci jenis kerajaan yang ingin dijadikan sistem pemerintahan negara ini yang dianggap oleh parti itu tidak kafir dan tidak sekular.

“Jika Pas tidak berhajat menipu orang Cina seperti Pas menipu orang Melayu, beritahu secara bertulis jenis kerajaan yang akan didirikan oleh Pas kepada sahabat karib Pas dalam DAP dan Suqiu,” katanya.

Beliau menyatakan demikian semasa menyampaikannya ucapan dasar Presiden pada Perhimpunan Agung UMNO di Pusat Dagangan Dunia Putra (PWTC) hari ini.

Menurut Perdana Menteri, pemimpin Pas mendakwa parti itu tidak mahu menipu orang Cina, tetapi mereka sanggup menipu orang Melayu.

Kata beliau, antaranya parti itu mendakwa masuk

Pas masuk Islam, undi Pas masuk syurga, sembahyang imam UMNO tidak sah, sembelihan orang UMNO haram dan bermacam-macam lagi.

“Sekarang beritahu apakah jenis kerajaan yang tidak mengikut sistem kerajaan UMNO yang dikatakan kafir yang hendak didirikan oleh Pas,” katanya.

Beliau seterusnya bertanya apakah kerajaan impian itu demokratik jika segala-galanya mesti dirujuk kepada Dewan Ulama yang tidak dipilih oleh rakyat?

“Apakah Pas bercadang untuk melaksanakan hukum hudud ke atas orang bukan Islam?”

“Apakah Pas akan menghapuskan Mahkamah Sivil dan hanya mengadakan Mahkamah Syariah sahaja untuk semua jenayah, termasuk kes liwat dan rogol?” tanya Presiden UMNO itu.

Dr. Mahathir berkata, Pas sudah menjanjikan tanah untuk ladang babi kepada orang Cina di Terengganu dan tanah simpanan Melayu di Kelantan untuk sekolah Cina.

“Sila beri maklumat berkenaan dengan dua janji ini. Kenapakah sementara orang Melayu dari negeri lain, termasuk Kedah tidak boleh memiliki tanah

di Kelantan, manakala orang Cina hendak diberi milik tanah,” katanya.

Beliau turut menghuraikan bagaimana Pas menipu orang Melayu dan bukan Melayu apabila sanggup tawar menawar mengenai hak keistimewaan orang Melayu semata-mata untuk mendapatkan undi.

Katanya, Pas sanggup menggugurkan apa sahaja yang dianggap hak orang Melayu apabila berhadapan dengan orang bukan Melayu.

## Tergadai

Pas juga, katanya, menipu orang Melayu dengan meyakinkan bahawa pendirian pemimpin parti itu hanyalah tipu helah untuk mendapat sokongan bukan Melayu.

“Kononnya pemimpin mereka begitu kuat pegangan kepada agama Islam dan tidak mungkin membenarkan hak orang Melayu Islam tergadai,” katanya.

Bagaimanapun, kata Dr. Mahathir, apabila sudah berjaya, pemimpin dan parti itu akan meneruskan agenda Islam mereka dan menipu orang bukan Islam.

Beliau juga meminta Pas menyatakan dengan jelas ukuran yang dikehendaki sebelum Malaysia boleh diakui sebagai negara Islam.

“Apakah hanya setelah hukum hudud dilaksanakan baru pihak ini (Pas) akan menerima kerajaan ini bukan kerajaan kafir, bukan sekular.

“Jika Pas berhasrat mengadakan kerajaan Islam, apakah Pas mahu menolak parti DAP dan Keadilan yang bukan Islam dan bukan Melayu yang sekarang menjadi rakan politik Pas?” kata Perdana Menteri.

Dr. Mahathir mempersoalkan sekiranya Malaysia bukan negara Islam, berapa banyakkah negara yang 40 peratus penduduknya menganuti pelbagai agama lain, dapat menjadikan Islam agama rasmi.

“Sedangkan dunia mengiktiraf Malaysia sebagai negara Islam dan banyak kerajaan negara Islam lain yang menganggap Malaysia sebagai contoh negara Islam yang terbaik untuk mereka,” tegasnya.

Presiden UMNO itu berkata, negara-negara Islam dan institusi-institusi Islam memberi pelbagai anugerah kepada Malaysia kerana kagum dengan kemajuannya dan kemajuan agama Islam di Malaysia.

Katanya, lebih 100 buah negara Islam dan bukan Islam menghantar penuntut mereka ke Universiti Islam Antarabangsa di Malaysia.

"Tetapi di Malaysia ada orang Islam yang mendakwa Malaysia bukan negara Islam dan pemerintahannya pemerintahan kafir dan sekular.

"Kita ingin tentukan yang mana satu dari negara yang dunia akui adalah negara Islam yang Pas terima sebagai Islam," katanya.

Beliau juga meminta Pas

menunjukkan negara mana yang melaksanakan hukum hudud di zaman ini jika pelaksanaan hukum hudud menjadi kriteria untuk Pas akui sebagai negara Islam.

"Setakat yang kita dapat sahkan, tidak ada satu pun negara yang menguatkuasakan hukum hudud, iaitu daripada cara perbicaraan sehingga ke pelaksanaan hukuman.

"Ini bukan bermakna mereka menolak hukum agama tetapi kerana masyarakat sekarang berbeza dengan masyarakat Islam di zaman Nabi," jelas beliau.

Dalam pada itu, Dr. Mahathir turut membidas Pas kerana mempengaruhi anak-anak Melayu kononnya ilmu pengetahuan selain daripada ilmu agama

adalah sekular dan tidak penting.

Katanya, jika anak Melayu mempelajari ilmu-ilmu pengetahuan pun mereka tidak cemerlang kerana menghabiskan lebih masa kepada acara dan kegiatan agama tambahan seperti qiamullail dan kuliah subuh yang diwajibkan oleh orang yang antiilmu.